



SAUNOAGA FA'AMANUIA MAI LE MĀLŌ MO LE TA'ALOGA
A LE MANU SAMOA MA IĀPANI.
AFIOGA I LE SUI PALEMIA: TUALA TEVAGA IOSEFO PONIFASIO
ASO TOFI, SETEMA 28, 2023

O le a to'a pea ia i ulufanua ma malae o toa, le fa'asuaga o 'ua o matagofie. Ua so'olagi fo'i sulu o mālāma, ma se'e i le laula'i le tautaiga na to'a i faga o le tuamasaga, auā ua gāfoa le ata o fana'e pupula, ma tofutofu ola le malaga, ina ua ifo le aso o le tupu.

Ou te fa'atulou atu i le tapuā'iga mau a le pa'ia mauāluga i si o tatou atunu'u pele o Samoa. O pa'ia fa'alemālō, auā le afio o lau afioga i le Ao Mamalu o le Mālō ma lau Masiofo, Le afio o le Sui o le Fono a Sui Tofia, aemaise le pa'ia o le tafatolu o le Mālō Tuto'atasi o Samoa.

O pa'ia fa'ale-atunu'u auā 'āiga ma tama, o tama ma 'āiga, fa'apea le usoga a Tumua ma Puleono i Salāfai. Aeā le fa'afofoga tapua'i mai a le afioga i le Kovana ma le faigāmālō a Tutuila ma Manu'a. O pa'ia auā Sua ma le Vaifanua, Itu'au ma Ālataua, Sa'ole ma Saleaumua ma le launiu saelua. Afifio Fa'atui ma To'oto'o o le motu, ma 'upu iā oe le Manu'atele.

Aeā le pale o le Talalelei, auā le tapuā'iga i Ta'ita'i o Ekalesia 'ese'ese ma le nofo-a-Fa'afeagaiga i so'o se fata faitaulaga i le atunu'u.

“O le Atua o le Fa'avae o lo tatou Mālō Tuto'atasi.”

E fa'apea fo'i ona fa'apa'i atu i le tapuā'iga a le pa'ia o le atunu'u o lo'o e'e ma pāpā'ā'ao i so'o se tafa o lenei kelo.

Fa'amālō le soifua laulelei ma le lagi e mamā. Ia vi'ia le Atua i lona alofa tunoa o lo'o lagona malūina ai pea la tatou folauga.

O lo'o silafia e le atunu'u, o le Aso Faraile nei i le taeao, o le a ta'a'alo ai la tatou Manu Samoa ma le 'au a lāpani i lana ta'aloga lona tolu o le Ta'amilosaga o le Ipu a le Lalolagi, o lo'o faia i Farani. E avea ai a'u nei, ma Sui o le tatou Mālō, i lana afioga i le Palemia, le Kapeneta, ma Samoa atoa, matou te momoli atu ai fa'amanuiaga i le tatou Au filifilia.

Lau Susuga i le Faiā'oga Ta'iulu ma Faiā'oga Lagolago, le Pulega o le 'Au, Lau Susuga i le Kapeteni ma le tatou 'au o le a fou atu mo le ta'aloga, e lē galo outou i le tatou Mālō, aemaise o le tapuā'iga mau a si o tatou atunu'u.

Matou te talitonu, o so'o se ta'aloga i le ta'amilosaga lenei o le Ipu o le Lalolagi, e lē faigofie, auā e leai lava se 'au o alo tamala i ai, ma e fia manumālō uma lava au ta'a'alo. A'o le mau a Samoa, "O faiva e tapuā'ia, e a'e manuia." Afai e lalago fa'atasi foe, ona foe lea o pese. Ae afai tatou te 'au fa'atasi ma le Atua, o ai ea se fa'asagatau mai?

O le tatalo a le tatou Mālō ma le atunu'u, ia fa'atelē e le Atua o outou loto, ia sautualasi lo outou mata'ālia, ma fa'aopoopo lo outou malosi ma le poto e fa'atino ai le ta'aloga. Ae sili le ta'a'alo fa'atausala ma fa'amoemoe mea uma i le Atua.

Ia pogisa outou tino, ae ia malamalama outou ala uma. Ia fa'atamatane, ia mau le to'ovae, ma ia loto tetele i le Ali'i. O lo'o tapuā'ia ma po le fala, ma ula le i'ulā e si o tatou atunu'u, e le gata i Samoa nei, ae fa'apea fo'i so'o se vaega o le lalolagi o lo'o afifio ai, auā lo outou alofaiva. O la matou tatalo, ia manuia la outou ta'aloga. O outou mamā na.

O alofa'aga ma fa'amanuiaga mai lo tatou Mālō, ma si o tatou atunu'u atoa.

SOIFUA

Talofa lava Samoa,

This week on Friday morning, our Manu Samoa will play its third game of the Rugby World Cup Championship against Japan's cherry blossoms in France. I wish to use this opportunity to convey our Manu Samoa team best wishes for a successful match on behalf of the government and people of Samoa.

To the Head Coach and coaching team, the team's administration, the captain and the team that has been selected to play Japan; you are all in our prayers. God is the source of your strength, wisdom and knowledge. Let us continue to lean on Him, and be of good courage, for He is our stronghold. If God is with us, who can be against us?

Let true sportsmanship prevail, and may you continue to journey in unity and in faith.

We want you to know your country stands united in support of their beloved Manu Samoa.

We look forward to watching the match and cheer you from home. May you have a great game and God bless you all.

SOIFUA MA IA MANUIA.